

# 1 Corintios

## *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cányiñe chë Jesucristbeyeca catšata Sósteneseftaca, <sup>2</sup> quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiamá; ndëmuanyënga Cristo Jesúsëftaca Bëngbe Bëtsá tojábiama chabe entšanga nye chábioye oservénënga, ndëmuanyënga Bëngbe Bëtsá tojáchembo chabe entšanga chašmotsemnama, chë nye quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

*Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiamá sempre sëndbétsatschuanaye, er tšëngaftanga cányiñe mo canyáca Cristo Jesúsëftaca šmómnayeca, Bëngbe Bëtsá tšëngaftangbeñe tojajuabó, tšëngaftangbe tšabiamá. <sup>5</sup> Chca Crístoftaca šmómnayeca, Bëngbe Bëtsá tojama tšëngaftanga chašmotsebomnama

chábentsana nyetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmésertama. <sup>6</sup> Chca, ntšamo cbonjanabuayiynacá mo Jesucristbe ndegombre soyëngcá, tšëngaftángnaca ínÿengbioye tšabá šmojinÿanyë ndegombre soyënga bëtsemnama, chë ntšamo jtsiyenama. <sup>7</sup> Y chca, Bëngbe Bëtsá chabe entšanga inétsatšatnaye tšabe soyënguentsana tondaye quecmochatabuáshebená, Bëngbe Utabná Jesucristo quem luarentše yochtónÿna tescama Bëngbe Bëtsábeñe jtsošbuáchiyëse chašmojtsobátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nyetsca entšangbiamá tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá nyets tempo jtsamana ntšamo tojašebuachenacá, y cha endmëna nda tcmojánachembo cánÿiñe mo canÿacá chašmotsemnama chabe Uaquiñá Jesucristoftaca, Bëngbe Utabná.

*Choca ošbuachiyëngbeñe nyetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiamá yomnama, tšëngaftanga nyetscanga cachcá

chašmotsejuabnama, y tšëngaftangbeñe ndoñe más báseftanga canye soye y ínÿenga inÿe soye chamuatsjuabná. Y aíñe šmochtsiyena mo canÿacá, nÿetscanga cachcá jtsejuabnayëse y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentsënga šmonjabëuenaye, tšëngaftangbeñe šmojtšenpenzentserama. <sup>12</sup> Ntšamo sëntsichamcá entsemna ndayá tšëngaftangbentse báseftanga šmojtsichamo: “Atše Páblëbe ustoná sëndmëna ca”; ínÿengna imojtsichamo: “Atšna Apólosbe ustoná sëndmëna ca”; ínÿenga: “Atšna Pédrëbe ustoná sëndmëna ca”, y ínÿengna: “Atšna Cristbe ustoná sëndmëna ca” imojtsichamo. <sup>13</sup> Chca šmojtsamama, jtsóbocanana mo cada básefta ošbuáchiyënga canÿe Cristo tmojtsebošë. ¿Pablo yojamna nda tmojancrucificá tšëngaftangbe tšabiamama? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bétsemnama? <sup>14</sup> ¡Bëngbe Bëtsá sëndbëtsatschuanaye atše ndocná tšëngaftanguentšá tijanábayama; nÿe Crispo y Gáybioye aíñe! <sup>15</sup> Chca, ndocná quenátobena jayanana, atše jótšëmbonëse uabainá cha tojanoquedá ca, mo átšbeñe ošbuáchiyënga cuaftsemná. <sup>16</sup> Estéfanasbe pamillentšëngnaca sënjanëbaye, pero ndoñe quetsatabouínÿna inÿa tijanábayama. <sup>17</sup> Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe

chë atšbe osertánanentšana palabréngama, sinó nýe chë buayenánama, Cristo cruzoca bēngbiamna tojanóbanama.

*Crístbeñe yomna Bēngbe Bētsabe obenana y osertánana*

<sup>18</sup> Quem buayenánana, Cristo entsangbiamna cruzoca tojanóbanama, chë pochocánēnga jtsemnana tmojtsajnēngbioye jtsinýanana mo ndoñe corente juabna bomnēngbe soycá; pero bēngbiamna, chë Bēngbe Bētsá nýetsca tescama šochjátsebacangbiamna, quem buayenánana jtsinýanýnayanana Bēngbe Bētsabe obenana.

<sup>19</sup> Ntšamo Bēngbe Bētsá chabe uabemana palabrénguiñe tojanayancá:

Atše chanjama chë tša osertánēngbe osertánana tondayama chaondētsoservénama;

y chanjama chë ba soyēngama osertánēngbe osertánana tondayama chaondētsámanama.

<sup>20</sup> ¿Ntsachetšá yojtsámana chë tša osertaná y chë puerte uatsjinýená tbojayana soyēnga? ¿Ntsachetšá yojtsámana chë tša tšabá chë soyēngama juabnayá, morscá, y ínýengaftaca enatsētsnaye ora chēngbe ayēnjanayá tojayana soyēnga? Ndegombre Bēngbe Bētsá tojinýanyé, chë quem luarentša bēts osertánánaca tmojayana soyēnga tondaye yonduámanama.

<sup>21</sup> Bēngbe Bētsá, nýets osertánana bomná quetsomñecá y puerte tšabá jtsejuabnayēse, ndoñe tonjanalesenciá quem luarentša entsanga cha chamotsábuatmama, chë quem luarentšēnga tša osertánēnga tmojánayanana soyēngama. Chamna, cha tšabá tbojanínýnana chábeñe ošbuáchiyēnga játsebacana chë bēnga

fsëndabuayiyáná soyëngama, masque ínÿengbioyna mo ndoñe corente juabna bomnabe soyca jtsinÿanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. <sup>23</sup> Pero bëngna Cristbiana entsanga fsëndabuayiyáná, chë ínÿënga tmojancrucificabiana. Quem buayenánana chë judiënga ndoñe tšabá ntjëuënanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soyca ca; <sup>24</sup> pero bëngbiana, nÿetscanga Bëngbe Bëtsá chabe entsanga chamotsemnana šojáchembëngbiamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soyca, pero ndegombre endmëna canÿe puerte más osertaná tojama soye, lempe ntšamo entsanga imotatšëmbuama. Y ndayá cha tojamcá masque bángbioye jtsinÿanana mo canÿe tondaye obenabe soyca, ndegombre chë soye jtsinÿanÿnayana Bëngbe Bëtsá puerte más obenana yobomnana, nÿets obenana ntšamo entsanga imobomnana. <sup>26</sup> Jesucrístbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entsanga chašmotsemnana tcmojánachembo ora. Tšëngaftangbentše nÿe báseftanga tša osertánënga šmojamna, ntšamo

chë osertánana bomnënga imomnana entšanga mondbetsejuabnycá; y báseftanga šmojamna becá mando atšetanënga o uámana pamillentšënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínÿënga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Crístoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bominiñe chamotsemnana, chabe entšanga jtsemnana chamobenama, puerte tšábënga cach Bëngbe Bëtsacá, y atsebácanënga chamotsemnana. <sup>31</sup> Y chca, ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

*Ntšamo Pablo Cristo crucificanábiama chënga tojanabuayená*

<sup>1</sup> Pero, Jesucristbeyeca atšbe catsátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ni chë tša osertánëngbe palabréngaca. <sup>2</sup> Y tšëngaftangaftaca sënjamna ora, ndoñe quetstétseboše nÿe ndayíñnaca jatsjuabnayana, ndayá nÿe Jesucristbeñe, nda bëngbe tšabiama tmojancrucificá. <sup>3</sup> Atše tšëngaftangbeñe sënjamna, mo canÿa ba soyënga jamama ndobenacá, y mo canÿa puerta auatjacá y tbojtsengmëmñnacá, chabe trabajo jamama ndoñe jobenayama juabnaye causa. <sup>4</sup> Ntsamo cbonjanëtsëtsná y cbonjanabuayiynacá atše sënjanoyebuambá ndoñe chë tša osertánëngbe palabréngaca, tšëngaftanga jáyëñjanama chiñe chašmotsošbuáchema; pero aíñe tcbonjanayëñjaná, Bëngbe Bëtsabe Espíritu y chabe obenana tšëngaftanga jinÿanÿiyëse, <sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe nÿe entšangbe osertánánaca, sinó Bëngbe Bëtsabe obenanama.

*Uámana Espíritbeyeca, Bëngbe Bëtsá jamana entšanga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsábeñe puerta jtsošbuáchiyama y chabe soyëngama corente jtsosertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entšanga quem tempo mondbétsichamo soyënga, ni mora quem luarentše amëndayëngbe soyënga, ndëmuanÿenga ndoñe bën y ndocna obenana bomnënga mochanjëftsoquéda. <sup>7</sup> Y aíñe, chë

bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninÿanyé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsétsanga y uámanënga jtsemnana, cháftaca chë nÿetsca tescama yomna tšabe vida jtsebomnama.

<sup>8</sup> Quem Bëngbe Bëtsabe puerte osertánana bomna soyënga endmëna canÿe soye ndayá quem luarentša amëndayënga ndoñe ntsësertánana, er chënga aíñe matënjanesértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna. <sup>9</sup> Bëngbe Bëtsabe uabemana palabrenguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga,  
ndocná tonjinÿe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanÿanyé, er chë Espíritu lempe jtsetatsëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entsángbeñe ndocná quenátobena jtsetatsëmbuana ndayá entsabe ainaniñe tomnama, sinó nÿe chë entsabe espíritu, chë chábeñe yomná. Cachcá, nÿe Bëngbe Bëtsabe Espíritu jtsetatsëmbuana ndayá Bëngbe Bëtsá



tojuabnacá. <sup>12</sup> Y bēngna, Bēngbe Bētsábiocana Espíritu tmojóyēngacñe, ndoñe canye quem luarentša espíritu, chca, bēnga chašósertama chē Bēngbe Bētsá tojama bēnga chamotsebomna soyēngama, bēngbe tšabiamana cha jtsejuabnayēse. <sup>13</sup> Bēnga chē soyēngama fsēndoyebuambná, ndoñe chē quem luarentša entšāngbentsāna tifjuatsjinye osertánana bomna palabrēngaca, sinó chē Bēngbe Bētsabe Espíritu šojabuatambá palabrēngaca. Chca, Bēngbe Bētsábiocana soyēngama bēnga fsēndabuayiná, Bēngbe Bētsabe Espíritbentsāna yóbocana palabrēngaca, chē Uámana Espíritu ainaniñe imobomnéngbioye.

<sup>14</sup> Bēngbe Bētsabe Espíritu ndoñe tondbomná, chabe ainaniñe ndoñe ntjóyēngacñana chē Bēngbe Bētsabe Espíritbiocana yóbocana soyēnga, er chē entšabiamana chē soyēnga jtsemnana mo canye ndoñe corente juabna bomnabe soyēngcá, y chabosertama cach ndoñe ntsoobenana. Chca endmēna, er entšá jobenayana quem soyēngama jtsetatšēmbuama y josértama, nye chabe ainaniñe chē Uámana Espíritu tbojtsájabuachañe. <sup>15</sup> Pero nda aíñe chē Espíritu tbojtsebomna jtsoobenana nyetsca soyēnga tšabá jinñama chabosertama, y ndocná chē Espíritu ndoñe tbondbomná ntsoobenana josértana ntšamo chē Espíritu bomná yomnama. <sup>16</sup> Er Bēngbe Bētsabe uabemana palabrēnguiñe mēntsá endayana: “Ndocná quenátabatma Bēngbe Utabnabe juabna, chábioye jabuátēmbama chaotsobenama ca.” Pero bēnga, chē ošbuáchiyēnga, mondobena jajuaboyana ntšamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamá*

<sup>1</sup> Pero, Jesucristbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nýe cachënga tšabá jtsomñama juabnënga bomna entsangbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canýe bebmácá, chabe basetémbioye nýe létšiyë jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiamá nýe chë más paselo josértama soyëngama, y ndoñe inýe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nýe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínýëngaftaca cabá yapa šmojtsenántšaboše y nýe ínýëngbioye jayëjnama soyënga šmojtsamëntsçuana, tšëngaftanga šmojtsama nýe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyëna mo chë nýe quem luarama enójuabnaye entsangcá. <sup>4</sup> Er canýa: “Atše Páblëbe ustoná sëndmëna ca”, y ínýana: “Atše Apólosbe

ustoná sëndmëna ca” tojayana ora, chca jtsamana mo chë nÿe quem luarama enójuabnaye entsangcá.

<sup>5</sup> Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo.

<sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatšé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe bėjaye cuaftsebuešcñacá, enjantrabája cach atše sënjanbojatšé chiñe; pero Bëngbe Bëtsá, ntšamo matatëmënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. <sup>7</sup> Ntšamo,

chë jená y chë matënguiñe bėjaye buešcñayá ndoñe yapa ntsámanana chiñe shajuanënga chaóboconama, nÿe Bëngbe Bëtsá aiñe, cachcá, nda Bëngbe Bëtsabiama entsanga jábuayenama trabajo tojabojatšé y nda chentšana tojáshjango cach trabajuiñe jóntšama, ndoñe ntjamana entsanga Jesucristbeñe chamotsošbuáchema; nÿe Bëngbe Bëtsá chca jamana. <sup>8</sup> Chë jená y chë matiñe bėjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts

yebncá. <sup>10</sup> Er Bëngbe Bëtsá atšbe tšabiamá jtsejuabnayëse, chë trabajo šojabonyë, y atše mo canye puerte tšabe jebuanacá, canye yebna ndayiñe chaotsëcuatjonama tojapormacá, sënjanbojatsë chë trabajo, Bëngbe Bëtsabe soyëngama tšëngaftangbeñe jábuayenama. Chentšana inya, mo chë inye yebna jebuaná tojabojatsë jajebuama chiñe más jatsjebuama nda tojatontšecá, cach atše sënjanbojatsë trabajuiñe tojanontšë. Pero cada ona botamana chaotsantješna ntšamo chë trabajo yojtsamama.

<sup>11</sup> Mo chë cányabentšana inye trabajayacá, ndoñe ntšobenana chë yebna jajebuama tojanbojatsë cha chë yebna chaotsëcuatjonama tojanpormañe inye soye cachcá chaoservema jatspórmana, cachcá, ndocná chaondëtsabatambá inye soyënga, nye ntšamo Jesucristbe soyënga yomncá aiñe, chë ntšamo atše natsana sënjanabatambacá.

<sup>12</sup> Chë Jesucristbiamá más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiamá nye nduámana soyënga buatëmbayana mo chë niñëbenga, butšajësha y tëshenjñësheca yebna jebuanacá. <sup>13</sup> Y Cristo chaojësabo te, Bëngbe Bëtsá echanjínyanyiye ntšamo cada cányabe trabajo yomnana. Cha chë te iñesheca chca echanjínyanyiye, y chë iñesheca, Bëngbe Bëtsá echanjinye y echanjínyanyiye ndaye trabajo cada ona tojamama. <sup>14</sup> Ntšamo cada cányabe trabajo yojtsámanama jtsetatšëmbuama Bëngbe Bëtsá chaojinye ora, cha chabe trabajo aiñe yojtsámana ca queojayanëse,

chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿama ndoñe paselo tondmëna soyëngaca. <sup>15</sup> Pero chë te cánÿabe trabajo nÿe batšá yojtsámanama Bëngbe Bëtsá iñesheca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuétsana. Cachcá, chë Bëngbe Bëtsabiana trabajo tojtsamá, nÿe batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

<sup>16</sup> ¿O tšëngaftanga ndoñe šmondëtatšëmbo nÿetscanga cánÿiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentšë Bëngbe Bëtsabe Espiritu yomnana? <sup>17</sup> Nderado nda tojama, tšëngaftanga nÿetscanga cánÿiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánÿiñe imomnënga, jtsemnana mo chë Bëngbe Bëtsabe bëts yebncá, chabe entšanga nÿe chábioye jaserviama; y tšëngaftanga chca šmondmëna.

<sup>18</sup> Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canÿe puerte osertaná inëtsemnana, cha bontsemna jóbemama mo canÿa ndabiana quem luarentša

entsanga chamuayana cha corente juabna ndbomná yomna ca, chca, ndegombre corente osertaná jtsemnama chaobenama. <sup>19</sup> Er chë quem luarentša entsanga tša osertánënga imotátšëmbo soyënga, Bëngbe Bëtsabe bominyiñe yomna mo chë corente juabna ndbomnabe soycá. Bëngbe Bëtsabe uabemana palabrénguiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínÿënga jáingñama tša osertánánaca tmojtsama soyëngaca ca.” <sup>20</sup> Y mëntšánaca endayana: “Bëngbe Utabná endëtatsëmbo chë tša osertánëngbe juabnënga todayama yondoservénama ca.” <sup>21</sup> Chiyeca, ndocná chaondëtsichamo corente uamaná yomna ca, ndaye entsabe ustoná tomnama, er lempe ntšamo šmobomncá, Crístbeñe ošbuáchiyënga bëtsemnama, tšëngaftangbe tšabiama endmëna, y nyetscanga chë tcmojujabuachëngnaca cachcá. <sup>22</sup> Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tšëngaftanga Crístbenga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

<sup>1</sup> Entsanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana

entsángbioye ndoñe tonjaninÿanyé, pero mora aíñe tojinÿanyé soyënga jtsabuátambayama trabajo bomnënga. <sup>2</sup> Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tšabe palabra bomná chaotsemnama. <sup>3</sup> Atšbe bariëna, tondaye quenatámana, ntšamo tijamcá šmojinÿe y ndoñe tšabá tijama ca šmojayanëse, o inÿe entsanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tajojtsemnama. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tšabá o ndoñe tšabá tijamama. <sup>5</sup> Chíyeca, tšëngaftanga ndoñe quecmátamna jinÿana y jayanana inÿenga ndoñe tšabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínÿanÿiye chë iytëmencá yomna soyëngama, mo ibetiñe cuaftsemncá, y botamana echanjínÿanÿiye, mo binÿniñcá, ndayá jamama nÿe chëngbe ainanoca entsanga tmojajuabocá. Y chora Bëngbe Bëtsá cada entsabiama echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminÿama, y chca

sěnjama tšěngaftangbe tšabiamana, ntšamo bëndata tífjamentšana chašmuatsjínŷama jtsiyenana nŷe ntšamo Běngbe Bětsabe uabemana palabrěnguiñe iuayancá, y ndocná tšěngaftanguentšá canŷe entšabiamana chaotsenábotamnaye, y ínŷabiamana ndoñe tšabá chauáttoyebuambnama. <sup>7</sup> Er, ¿nda chě ínŷengbiamana más uámaněnga tšěngaftanga cmojtsabiamná? ¿Y ndayá šmobomna, Běngbe Bětsá ndoñe tcmonjatsatá soye? Y tšěngaftanga chca chašmotsebotamnana cha tojanmese, ¿ndáyeca šmojtsenabotamná mo Běngbe Bětsabe tšetana soyěnga ndoñe tontsemncá, y nŷe cach tšěngaftangbeyeca šmojonŷencá?

<sup>8</sup> Tšěngaftanga šmojtsejuabná ya lempe ntšamo cmějbotcá Běngbe Bětsábiocana šmojtsebotmna ca, y lempe ntšamo jtsebošama šmojtsobencánaca ca. Mo reyěnga cuaftsemněngcá cmojtsabiona, běngbentšana tondaye ntsějbotcá. Malaye tšěngaftanga mo reyěngcá šmojtsemna, Crísoftaca cánŷiñe jtsemándayese; chca, běngnaca tšěngaftangaftaca jtsemnama, cánŷiñe jtsemándayese. <sup>9</sup> Atše šontsinŷana, běnga chě Cristbe ichmóněnga Běngbe Bětsá šojábiamana mo chě nŷetscangbiamana más nduamaněngcá, mo chě jóbanama yojtsamna entšangcá. Nŷetscanga chě Běngbe Bětsá tojábiaměnga běngbioye jtsěnyayana mo ndoñe cachca entšanga fstsemncá; angelěnga y entšágnaca cachcá běngaftaca montsama. <sup>10</sup> Běnga, Cristbiamana oservena causa, quem luarentša entšangbiamana fsěntsinŷna mo corente juabna ndbomněngcá; chě cuenta, tšěngaftanga šmojtsejuabná Cristbe



soyëngama corente osertánënga šmomna ca. Bënga fsëndmëna chë entsangbe bominyiñe ndocna obenana ndbomnënga; y tsëngaftangna šmojtsejuabná puerte obenana bomnënga šmomna ca. Tsëngaftangbioye ínÿënga puerte uámanënga y bëtsétsanga jtsabiamnayana, pero chënga bëngbioye jtsëbuayënjana. <sup>11</sup> Y mëntscoñama, bënga šontsabuashebebiana saná, ndayá jofšiyama y entsáyá. Entšanga bëngbioye bacá jtsaborlánana, y tondaye yebna queftsátsbomna. <sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbétseimpadana cha chaoma chënga tšabe bendicionënga chamotsebomnama. Bënga chamosufrima ínÿënga tmojtsama ora, bënga chë soye fchandbétsoboyaye. <sup>13</sup> Inÿënga bëngbiana bacá tmojtsoyebuambná ora, jtsababuánÿeshanëse fsënduamana jtëjuana. Quem luarentša entsangbe bominyiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservénënga, mo chë quem luarentša tsengacá; y chca endmëna mëntscoñama.

<sup>14</sup> Quem soyënga ndoñe quecbatëbuabiamná tsëngaftanga chašmotsëuatjama, sinó ndayá jábuayenama mo cach atšbe basëngbioycá, atšbe bonshánënga. <sup>15</sup> Er masque tsëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tsëngaftangbiana mo taitangcá, Cristo Jesúsbeñe jtsošbuáchiyama

tcmojanéjabuachama. Nýe atše sëndmëna mo taitacá tšëngaftangbiama, mo ošbuachiyëngcá, er atše natsana tconjanabuayená chë tšabe noticiënga Jesucristbiama, y tšëngaftanga chiñe šmontsanošbuaché. <sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšëngaftangbioye sentsichamná, atšbe bonshaná, canýe aíñe tšabe palabra bomná; Bëngbe Utabnábeñe tojanošbuachéyeca, atše Cristbiama sënjanbuayiyná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Crístbeñe ošbuachiyacá, ndayama atše nýets tempo ošbuáchiyënga sëndbetsabuatambaycá nýets luare ošbuáchiyënga enefjuanenache.

<sup>18</sup> Tšëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca. <sup>19</sup> Pero Bëngbe Bëtsá

chašojalesenciase, sentsobátmana betscó tšëngaftangbioye jama jányama. As chjinýe ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nýe ntšamo jayanama imobencá. <sup>20</sup> Er Bëngbe Bëtsá canýe ošbuachiyabe ainaniñe tojtsemánda ora, chca jtsinýnana ndoñe nýe ntšamo tojtsichámuama, ndayá Bëngbe Bëtsabe obenana chábeñe tojtsemnama.

<sup>21</sup> ¿Tšëngaftanga ndayá más šmattseboše: atše chayá tšëngaftangbioye jaucácanama, o chayá

tšëngaftangbioye jányama puerte bonshanánaca y ntsetsatjaycá tšëngaftanga jauyanama?

## 5

*Ndayá cuanjama canye boyabása shembásaftaca bacna soye amáftaca*

<sup>1</sup> Ndegombre nyets luariñe entsótatsëmbo tšëngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entšá cachabe mamamnáftaca bacna soye yojtsama.

<sup>2</sup> Y tšëngaftanga cabá šmojatsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngmënaca jtsemnana, tša uabouana soye cha yojtsama causa. Canye entšá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá. <sup>3</sup> Y atšna, masque tšëngaftangaftaca choca ndoñe quetsátsmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojëftsanatšetá mándoca, sënjajuabó y sëntsetatsëmbo ntšamo tšëngaftanga cmojtsamnana, chë entšá chca tojamáftaca. <sup>4</sup> Tšëngaftanga chašmojënefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca. <sup>5</sup> Y chora tšëngaftanga cmontsamna jamándana chë entšá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšinë cha

cuafjaboshjoncá, chca, chë quem entsá nÿe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatsëmbo, ntšamo chë nÿe batsá levadura endbama, nÿets arninÿá chauábochemá; cachcá, tšëngaftanguentše canÿa tša bacna soye chca tojama ora, nÿetscangbiama ndoñe tšabe soyënga jóbocnana. <sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninÿacá, ndocna levadúraca, chë bacna juabnëngaca ya ndëmandánënga šmojtsemnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebonnama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsana bënga játsebacama. <sup>8</sup> Ntšamo chë judiënga chë fiesta ora mondbamcá, nÿets levadura ojamnana cachcá jonÿayana, cachcá, bënga šontsamna jtsajbanana oyenana bacna soyënga ínÿengbiama jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nÿe levadúraca ndëpormana tandëse mondbetsesaycá, cachcá, bënga šontsamna

jtsiyenana nÿetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuéntaca. <sup>10</sup> Y chca ndoñe quetstétseboše jáuyanana nÿa tondayama chašmondëtsoyebuambná nÿetsca chë quem luarentšënga boyabása o shembásaftaca bacna soye amëngaftaca, chë nÿe cachëngbiana bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nÿa chca jamamna, tšëngaftanga cmattsamna quem luarentšana jéftsebocanana. <sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomnaca tojayanáftaca, y boyabása o shembásaftaca bacna soye tojtsama, o nda nÿe cachabiana bëtscá soyënga jtsebomnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšángaftacna, ni mo šmuatjótbema chëngaftaca cánÿiñe jasama. <sup>12-13</sup> Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aiñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nÿe chë ošbuáchiyënga

tšëngaftangaftaca imnénutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguifne endayancá: “Tšëngaftanga cmontsamna, chca bacna soye amá tšëngaftangbentšana jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canýe tšëngaftanguentša ošbuachiyá inýe ošbuachiyabiana canýe demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšángbioye nanjá chabe demanda chamouenama? <sup>2</sup> Tšëngaftanga ndegombre šmondétatšëmbo, Bëngbe Bëtsabe entšanga mochjayanama quem luarentša entšangbiana tšabá o ndoñe tšabá tmonjamama. Y chënga quem luarentša entšangbiana chca jayanama tmojt-sobenëse, ¿ndoñe montsobena más base soyëngama chca jayanama? <sup>3</sup> Tšëngaftanga ndegombre šmondétatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana. <sup>4</sup> Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmonsámama entšanga, chë soyënga chamojandmanama? <sup>5</sup> Chca sënjayana tšëngaftanga chašmotsëuatjama: ¿O tšëngaftanguentše ni mo canýa yondmëna

corente osertaná, ošbuachiyěngbeñe demanděnga chaojandmanama? <sup>6</sup> Pero ndoñe chca: ošbuachiyěngbeñe demanděnga tojtsemna ora, mandaděngbioye jana chě soyěnga chamojandmanama. Y chca jamana ndošbuáchiyěnga mandaděngtaftaca.

<sup>7</sup> Y tšěngtaftangbeñe nýe demanděnga jájandmanama tojtsemna ora, tšěngtaftangbiamaya canýe puerte bacna soye jtsemnana. ¿Ndáyeca ndoñe šmattsóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiatbēbana ora? <sup>8</sup> Pero cach tšěngtaftangtaftacna inýetsá copasana, ínýengbioye bacá jtsaborlánana y jtsabiatbēbanana, y tšěngtaftangcá Crístbeñe ošbuachiyěngbioynaca.

<sup>9</sup> ¿Tšěngtaftanga ndoñe šmondétatšěmbo, chě bacna soye aměnga Běngbe Bětsabe aměndayoye ndoñe mochanjámashěnguama? Ndoñe matenoíngñana. Ni chě boyabása o shembásaftaca bacna soye aměnga, ni chě cachěngbe pormana soyěnga diosěnga yomna ca jtsejuabnayěse adórayěnga, ni cachěngbe boyá o shema ínýaftaca íngñayěnga, ni chě boyabásenga mo shembasengcá jtsinýnama bošěnga, ni chě boyabásenga inýe boyabásengtaftaca bacna soye aměnga, <sup>10</sup> ni chě atbēbaněnga, ni chě nýe cachěngbiamaya bētscá soyěnga jtsebomnama tša bošěnga, ni chě tša tmoyěnga, ni chě uayátsenayěnga, ni chě ínýengbiamaya bacna soye jtsaměse innétsatbēbaněnga, chěnga nýetscanga ndoñe quemochatobenaye Běngbe Bětsabe aměndayoye jamashjnama. <sup>11</sup> Y

tempo báseftanga tšëngaftanguentsënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebénënga cuaftsemncá; cha tojama tšëngaftanga chabe entšanga chašmotsemnana, nÿe cha chašmotseservénama, y tojama tšëngaftanga mo tšabengcá chabe bominÿiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

*Bëngbe cuerpo chaotsemna Bëngbe Utabná jt-seservénama*

<sup>12</sup> Mondbétsichamo: “Atšbiamna entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiamna ntsemnana. “Atšbiamna entselesenciana ndayánaca jamama ca”, pero ndoñe quichatsleséncia ndaye sóyecnaca nÿets tempo mandaná jatsmënana. <sup>13</sup> Mëntšánaca mondbétsichamo: “Saná uafsbiamna y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiamna cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiamna tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca cánÿiñe mo canÿacá šmomnana yomna mo tšëngaftangbe cuerpo chabe cuerpentša soye



cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntsamo atše chjátobena atšbe cuérpoca, chë ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatsëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrënguiñe boyabása y shembása tbojéninÿenama mëntšá endayana: “Chë útata mo canÿacá bochantsema ca.” <sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebonncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatsëmbo tšëngaftangbe cuerpo yomna mo canÿe yebncá Uámana Espiritbiama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna,

sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtsá cuafjopagacá tšëngaftanga Bëngbe Bëtsábenga chašmotsemnama. Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtsá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bëtsemnama; y chabe shémnaca cachcá chabe boyabiama chaoma. <sup>4</sup> Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá, chë boyabe cuerpo ndoñe nÿe cha cánÿabiama ntsemnana, sinó chabe shembiámnaca. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye

chaócochënguama, cachënga jenomándama ndoñe tmontsobena causa.

<sup>6</sup> Atše chca sëntsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama.

<sup>7</sup> Y atšbe bariëna, atšbe juabna entsemna malaye nÿetscanga chë soyënguiñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna inÿe soyama.

<sup>8</sup> Chë cabá ndbouamnënga y viudanga sëntsëtsëtsná, chëngbiana tšabá yojtsemna ntjobouamaycá joquédana, atšcá. <sup>9</sup> Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jésejuabnayana.

<sup>10</sup> Pero chë bouamnënga sëntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñiana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebmna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá. <sup>13</sup> Nderado

canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana.

<sup>14</sup> Er Bëngbe Bëtsá tojama, canÿe shembása ošbuachiyá chabe entšá chaotsemnana, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondménayeca, canÿa o nÿets uta bëtsétsatbe ošbuáchiyama, Bëngbe Bëtsá jtsejuabnayana chë básengbiana mo chabe entšangcá.

<sup>15</sup> Pero chë boyá o shema Crístbeñe ndošbuachiyá cachcá jtsenónÿayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama.

<sup>16</sup> Chca šmochjama, er aca shema ¿ntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, atsboaná chaotsemnana? o aca boyá ¿ntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema,

y chca, atsbocaná chaotsemnama?

<sup>17</sup> Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbétsamëndaye.

<sup>18</sup> Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobianná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënanana, ntšamo chë judiënga monduamancá.

<sup>19</sup> Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. <sup>20</sup> Cada ona bontsemna jtsiyëñana, ntšamo yojoyencá, chabe entšá chaotsemnama Bëngbe Bëtsá tbojanchembo ora.

<sup>21</sup> Bëngbe Bëtsá tcmojanchembo ora, nyets tempo ínÿabiamana oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnama, cach acbiamana jatrabájama, as chca cochjama.

<sup>22</sup> Er chë nÿe ínÿabiamana nyets tempo oservená yojamná, Bëngbe Bëtsá chabe entšá chaotsemnama tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnéngaca mandaná, sinó Bëngbe Utabnabiamana oservená. Cachcá, chë nÿe cachabiamana trabajayá yojamná, Bëngbe Bëtsá tbojanchembo ora, mora cha

nÿets tempo Cristbe oservená jtsemnana. <sup>23</sup> Cristo bēngbiana tojanóbana ora, yojamna mo cha bētsá cuafjopagacá, bēnga Bēngbe Bētsabe entšanga chamotsemnana. Ndoñe šmatjaleséncia nÿe entšangbe juabnēngaca nÿets tempo mandánēnga chašmotsemnana, y Bēngbe Bētsabiana chacmotsebnētjomba. <sup>24</sup> Chcasna, Jesucristbeyeca atšbe catšátanga, cada ona bontsemna Bēngbe Bētsáftaca jtsiyeñana, ntšamo yojoyencá Bēngbe Bētsá tbojanchembo ora.

<sup>25</sup> Y chē ndēbouamna shembásengbiana, chēnga aíne o ndoñe yontsamna jobouamayamna, atše chama ndoñe Bēngbe Utabnabe canÿe mando quetsátsbomna, pero chanjayana ntšamo atše tsjuabnacá. Bēngbe Bētsá atšbe tšabiana tojanjuabóyeca, entšanga montsobena jtsejuabnayana aíne tšabe palabra bomná chiñe atše tsmēnama. <sup>26</sup> Atše šontsinÿana, entšá ibojtsemna jtsomñana nÿe ntšamo mora yotsomñcá, er bēnga mora montsiyena puerte padecena soyēnguiñe. <sup>27</sup> Shema tcobomñese, ndoñe cachcá catjēftsonÿaye; y ndoñe tcondbomñesna, ndoñe catjátsēnguaye. <sup>28</sup> Tcojobouamase, bacna soye ndoñe quecátama; y nderado canÿe tobiaše tojobouamase, cach bacna soye ndoñe quenátama. Pero chē tmojtsobouamangna padecena soyēnguiñe mochanjoyena quem luarentše chamojēftsemnēntscuana, y atše séntseboše chēnga jujabuáchama chca jatiyenama ndoñe chaondétsamnama.

<sup>29</sup> Jesucristbeyeca atšbe catšátanga, ntšamo séntseboše jayanamna mēntšá entsemna: Cristo quem luaroye yochjésabo orscama ya nÿe

batśá entsájamna. Chíyeca, morscana y nýets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntśá, entsamna jtsentśénana Bëngbe Bëtsabe soyënguiñe, y ndoñe nýe chë bouamná bëtsemnama tbojtsemna soyënguiñe. <sup>30</sup> Cachcá, chë puerte ngmënaca tśa ośachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. <sup>31</sup> Chë quem luarentśa soyëngaca jtsiyenama imojtsentśénënga entsamna jtsiyenana mo ndoñe chca tmontsamcá, er quem luare ntśamo bënga mora monduabuatmcá, pronto echanjochnëngo.

<sup>32</sup> Atśe sëntseboše tśëngaftanga ndoñe chašmondëtsenocochinýenama. Canýe entśá ndoñe bouamná tontsemna ora, jtsobenana jtsentśénana Bëngbe Utabnabe soyëngama jtsejuabnayama, y ntśamo oyejuayá cha jabemama; <sup>33</sup> pero chë bouamná nýets tempo jtsenócochinýenana quem luarentśa soyëngama, jtsiyenama, y ntśamo chabe shema oyejuayá jtsebomnama; <sup>34</sup> y chca, cha uta soyiñe canýe ora jtsentśénana. Chë ndëbouamna shembása y chë tobiase bontsobena jtsentśénana Bëngbe Utabnabe soyënguiñe sempre jtsejuabnayama. Chënga mondobena jtsentśénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inýetśá, chë bouamna shembásana, nýets tempo jesenócochinýenana

quem luarentše vida jtsebomnama soyëngama, y ntšamo chabe boyá oyejuayá jtsebomnama.

<sup>35</sup> Atše chca cbontsëtsëtsná tšëngaftangbe tšabiamá, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nÿe Bëngbe Utabná jtseservénama chašmotsentšénama.

<sup>36</sup> Nderado nda tojtsejuabná chabe uatsëtsnaye tobiášeftaca jtsobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. <sup>37</sup> Pero nderado inÿa, tondaye obligaciönaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana. <sup>38</sup> Chcasna, chë tobiášeftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá. <sup>40</sup> Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe



Espíritu chašotsebuayiynama.

## 8

*Uátsëmbona saná entsangbe pormana soyëngama*

<sup>1</sup> Mora chanjóyebuambaye ndayá tšëngaftanga atše šmojatjama, ndayá jtseyayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondétatsëmbo bënga nÿetscanga osertánënga imomnama. Canÿa tbojtsosertana ora, cha nderado nanjájuaboye, chca bétsemnama puerte uamaná cha yojtsemna ca, pero canÿa, ínÿenga tojtsababuánÿeshana ora, cha jtsobenana chënga becá jujabuáchana. <sup>2</sup> Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. <sup>3</sup> Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

<sup>4</sup> Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátsëmbona soyëngamna, atše šcuayana: bënga corente mondétatsëmbo chë chënga imnëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. <sup>5</sup> Pero masque celoca y quem luarentše chamomna entsangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiana diosënga ca

ubuátmēnga, y banga bēts mándoca entsangbiana “utabnēnga ca” uabáinēnga), <sup>6</sup> bēnga chē ošbuáchiyēngbiamna n̄ye can̄ya Bēngbe Bētsá endmēna, Bēngbe Taitá, ndábentšana n̄yetsca soyēnga yóbocana, y n̄ye nda jtse servénama bēnga imoyena. Y n̄ye can̄ye Utabnánaca endmēna, Jesucristo, ndábeyeca n̄yetsca soyēnga yomna, y cach bēngnaca imomna.

<sup>7</sup> Pero n̄yetsca ošbuáchiyēnga ndoñe chca quemátstatsēmo. Básefta entsanga, Crístbeñe cabá ntsošbuáchiye ora, imojanamana ndaye sanánaca juatsēmbonana, chē chēnga imojanjuabná diosēnga yojamna ca soyēnga jadórama; chēnga, chca uatšēmbonana tmojtse sá ora, jtsejuabnayana chca uatšēmbonana bétsemnana, y ainaniñe juabnēnga jtsebomnana ndoñe tšabá tmonjamama, chana tmojase causa. Chēnga, ndayá tempo imojánamama, ndoñe quemátobena tšēngaftangcá jtsejuabnayana, chcana jasana bacna soye ndoñe yondmēna ca. <sup>8</sup> Ndegombre, ndayá bēnga tmojtse sacá ndoñe ntjamana bēnga Bēngbe Bētsábioye más chamuatobéconama. Bēnga Bēngbe Bētsabe bomin̄yiñe ndoñe quemochátsmēna más tšábēnga aíñe tmojtse sama; ni ndoñe chcanga, ndoñe tmontse sá causa.

<sup>9</sup> Pero cuedado šmochtse bomna, ndayá jamana yolesenciánama tšēngaftanga corente tšabá šmotatsēmbuama, ndayánaca jatsmana, y chca causa ín̄yēnga, chē soyēnguiñe más batšá ošbuáchiyēnga y osertánēnga, ntšamo tšēngaftanga šmojtse samcá chamuatse mama, y chentšana, chēngbe ainaniñe juabnēnga chamotse bomna y chēngbioye chaotsētsētná ndoñe tšabá

tmonjama ca. <sup>10</sup> Er, aca chë soyëngama tatsëmbuá, nderado tcojót'bema jasama canye luarentse, canye soye ndayama entsanga dios yomna ca jtsejuabnayëse adórayentse, y canye Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondëtatšëmbo causa, y cha nderado chentse cojtsesama tcmojinjëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. <sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucrístbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatsëmbuá, cha pochocaná chaotsemnana, er chabe ainanentse echántsemna juabnënga canye bacna soye tojamama, chë saná tojasama. Chca nderado cányabioye catjama, ndabiama Cristo tojanóbana, cha jatsbocama. <sup>12</sup> Jesucrístbeyeca acbe catšatbiama chca bacna soye tcojama ora, chca causa cha canye soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nye chë catšatbiama, ndayá cach Crístbiámnaca. <sup>13</sup> Chíyeca, nderado ndayá atše stsesama, atše tsjama Jesucrístbeyeca atšbe catšata chaoma canye soye y chca jamama chabiama canye bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatšama.

## 9

*Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentsana. <sup>2</sup> Masque ínÿenga atšbiamana ndoñe quematsjuabná atše canye Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canye ichmoná tsmënama.

<sup>3</sup> Mëntšá chanjayana chë atše ndoñe tšabá tijama ca imojtsichámëngbiamana: <sup>4</sup> Ndegombre bënga nÿets derecho fsëndëtsóbomñe jtsobátmanama tšëngaftangbentsana, chë tchojujabuáchëngbentsana, bëngbe trabajuama saná o ndayá jofšiyama chašcuacaredadama. <sup>5</sup> Y bëngnaca derecho fsëndëtsóbomñe canye shema ošbuachiyá jtsebomnama y bëngaftaca cha jëftsbešama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catsátanga y Pédrënaca mondbetsamcá. <sup>6</sup> ¿O nÿe Bernabé y atše šojtsëtocana cabëndatbe cucuátšeca jatrabájana vida jtsebomnama, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama? <sup>7</sup> ¿Ndëmua

mo canye soldadca tojtsoservená, ndayá tbojtsájobotama cachá nantsatopagana, vida jtsebomnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létsiyentsana ndoñe ntjofšiyama. <sup>8</sup> Ntsamo atse muentše sëntsichamcá ndoñe ñye entsangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyíñe mëntšá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca.” Y chca ndoñe quenátayana Bëngbe Bëtsá ñye toronga inétsanÿena ca, <sup>10</sup> sinó inÿe más bëts soye; chca endayana ndayá ndegombre bënga, chë Bëngbe Bëtsabiamá soyëngama abuaiynayiñe trabájayënga cha šnetsanÿena ca. Chca tmojanábema bëngbiamá, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentsana batsá jójyëngacñama. <sup>11</sup> Y chca, bënga chë tsabe noticiëngama tbojábuaenase, y chca, Bëngbe Bëtsábicana tsabe bendicionënga chašmotsebomnama bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëftsiyenama chašcuatšatama. <sup>12</sup> Inÿenga derecho tmojtsebomna tsëngaftanga jótjañana chë šmobomnentsana chašmuacaredadama, tsëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca

játamamna, bēnga lempe fsēntsoboyá, chca, bēnga tondaye ntjátamama, y chē causa entsanga ndoñe chašondétsayaunana, bēnga chē tšabe noticiēnga fstsabuayiyná ora. <sup>13</sup> Tšēngaftanga šmondētatsēmo, Bēngbe Bētsabe bēts yebnoca trabájayēnga Bēngbe Bētsabiana oservéniñe, mondbóyēngacñe chēnga jasama, ndayá entsanga Bēngbe Bētsá jadórama chabe bēts yebnoye tmojiyēbo sananguentsana. Y chē Bēngbe Bētsá jadórama soyēnga amēnga, altaroca, chē juatšēmonama luarentše, chēnga jasana ndayá chentše tmojuátšēmona soyēnguentšana. <sup>14</sup> Cachcá, Bēngbe Bētsá tojamandá, chē tšabe noticiēnga abuayiynayēngna, vida jtsebomnamna lempe ntšamo tojtsējabotcá chamóyēngacñe ca, chē tšabe noticiēnga abuayiynayama. <sup>15</sup> Pero atše ndocna te chiyaisemandá ínŷēnga chca chašmotsecuedánama, atše chē tšabe noticiēnga abuayiynayá bētsemnama chca derecho tsbómnyeca, y cach ndoñe mora quem soye quechatēbuabiamná, tšēngaftanga ndayánaca atše chašmuatšetama. Atšbiana más tšabá nántsemna jóbana, y ndoñe ntjalesénciana ínŷa chaoma atše cach atšbiana oyejuayá ndoñe ntjátsmēnama, ínŷēngbentšana soyēnga stjóyēngacñe causa.

<sup>16</sup> Atše ndoñe quetsatsjuabná atše canŷe bēts soye stsama ca, chē tšabe noticiēnga stsabuayiynama, er atše obligaciónca sēntsemna chca jtsamama, Bēngbe Bētsá chama šojanchémboyeca. ¡Tša lastemcá atšbiana nántsemna, chē tšabe noticiēnga ndoñe sēntsabuayiynasel! <sup>17</sup> Chíyeca, atše chē tšabe noticiēnga stsabuayiyná nŷe atše chca

jamama stsebóseyeca, atšbe uacanana soye ya stsebmna; pero atše chca stjama, y ndoñe tontsemna nýe atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonýecá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuayiynayama, ošbuachiyëngbentsana atše vida jtsebmnama tondaye ntjatoyëngacñecá; chca, atše tondaye quetsátama chë tšabe noticiënga abuayiynayama tsbmna deréchoca, chë atšbe trabajuentsana vida jtsebmnama.

<sup>19</sup> Atše, masque ndocna entšábeyeca nýets tempo mandaná quetsátsmëna, puerte nduamaná sënjobema, mo canya nýets tempo ínýabeyeca mandanacá, nýetscanga jaserviama, chca, atše chca jtsamëse, jobenayama becá entšanga, ntšamo tojopodecá, jayëñjanama Crístbeñe chamotsošbuáchema. <sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nýe batšatema ošbuáchiyëngbiamna y Bëngbe

Bëtsabe soyëngama nÿe batšatema osertánëngbiana, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñana, chë atsebácanënga Bëngbe Bëtsá yochjatšataye tšabe soyënga.

<sup>24</sup> Tšëngaftanga šmondétatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñana tmojotjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñana. <sup>25</sup> Nÿetscanga chë tmojótjajënga ínÿenga jáyënjanama, chënga jopróntana nÿetsca soyënguiñe jtsenomándayëse, chca, canÿe uacanana soye, tsbuanachëngaca uapormana coronësha juayëngacñana; y chësha betesco jtsanctana. Pero bënga ndoñe; bënga mondoyena Cristbiana soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñana, y chë soyënga nÿetsca tescama bënga mochanjëftsebomna. <sup>26</sup> Y atšna, atšbe bariëna sëndëntšena Bëngbe Bëtsá jtseservénana, ndoñe mo canÿa ínÿengbioye jáyënjanama tojotjajuacá, chë ndëmoye jashjanguama yomnana ntsetatšëmbcá; y cach ndoñe mo nda tojtsepeliá orcá, chora,



cha nÿe ínÿoye chabe buacuatšënga tojtsëtsana y chë ínÿabe cuerpo ye ndoñe. <sup>27</sup> Mo canÿe tšabe peliayacá, chabe cuerpo játssetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbioye jtse servénëse chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

*Cach entšangbe pormana soyënga ndoñe chamondëtsadoránama jábuayenama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëts taitanga judiënga, chënga nÿetscanga Bëngbe Bëtsá canÿe jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. <sup>2</sup> Chë jantšetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nÿetscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nÿetscanga tmojanofšé chë Bëngbe Bëtsá tojanma chë peñësentšana chaóbozna bëjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentše chëngaftaca tojanopasacá, yojaninÿanÿná Cristo chënga yojtsanÿenama. <sup>5</sup> Masque chca, banga chëngaentšënga ntšamo tmojanmama Bëngbe

Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

<sup>6</sup> Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

<sup>7</sup> Chíyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrengüiñe chëngbiamá endayancá, chënga canÿe ternerá castellánoca tmojanpormá ora, mo dios cuaftsemncá jadórama: “Entsanga tmojanotbiamá jasama y jatmuama, y chentšana tmojantsbaná joboyeuama ca”. <sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canÿe te, uta bnëtsana y unga uaranga entsanga tmojanóbana <sup>9</sup> Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtšenënga. <sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana šojtsamnama, y Moisés,

Bëngbe Bëtsabe uabemana palabrënguiñe chca tojëftsanboshjona bënga jabuátambama, bënga, chë Jesucristo yochjésabo orscama ya batsatema yojsájamna ora oyenëngbiama. <sup>12</sup> Chcasna, nda tojtsejuabná Bëngbe Utabnabiama tšabá yojsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. <sup>13</sup> Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondétatšëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínÿenga jtsejuabnayana diosënga yomna ca. <sup>15</sup> Atšë sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo cbojtsëtsësnacá aiñe o ndoñe tšabá bétsemnana. <sup>16</sup> Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿnayana bënga Crístoftaca

cányiñe mo canyáca imomnama, chabe buiñe juabuáshanese bēngbiana tojanóbanayeca. Y chē mondbajataye tandēse tmojase ora, jtsinyanayana bēnga Crísoftaca cányiñe mo canyáca imomnama, cha bēngbiana tojanóbanayeca. <sup>17</sup> Bēnga ošbuáchiyēnga masque banga mondmēna, chca orna nyetscanga cach tandēsentsana bēnga jasana, y chíyeca bēnga jtsemnana mo canyáca, mo Cristbe cuerpcá.

<sup>18</sup> Tšēngaftanga šmochtsejuabnaye ndayá chē Israeloca bachnanga monduamanama: chēnga chē altaroca tmojóba y tmojuátšēmbona bayēnguentsana jasana, y chca chēnga chora jtsinyanayana chēnga cányiñe mo canyáca imojtsemnana Bēngbe Bētsáftaca, chē chca tmojtsadoranáftaca. <sup>19</sup> Y chca, atše ndoñe quetsátsboše jayanama chē entsangbe pormana soyēnga mo diosēnga cuaftsemncá, uámana soyēnga yomna ca. Ni chē cach entsangbe pormana soyēnga diosēnga yomna ca jtsejuabnayēse jadórama uátšēmbona saná inye sanama más iuámana ca. <sup>20</sup> Pero aíñe, entsanga cach entsangbe pormana soyēngama mo diosēnga cuaftsemncá, chca tmojuátšēmbona ora, ndegombre chēnga Satanás y chabe uajabuachanēngbioye jtsadoránana, y ndoñe Bēngbe Bētsábioye. Y atše ndoñe quetsátsboše, tšēngaftanga chca uatšēmbonana šmojasama, cányiñe mo canyáca chē bayējēngaftaca chašmotsemnana. <sup>21</sup> Tšēngaftanga ndoñe quešmátobena chē vínoye coptémentšana jofsiyana, ntšamo chē ošbuáchiyēnga bétsemnana mondbetsamcá, y chentšana chē cach entsangbe

pormana soyënga, mo diosënga cuaftsemncá jadórama vínoye coptementšánënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jt-samana. ¿O imojtsejuabná bënga chabiamas más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnana jinÿanÿiyama*

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nÿetscangbe tšabiamas ntsemnana. “Entselesenciana ndayánaca jamama ca”, pero nÿetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana. <sup>24</sup> Ndocná chaondëtsama lempe ntšamo tojobenacá nÿe cachabe tšabiamas, ndayá más chaotsama chë ínÿengbe tšabiamas.

<sup>25</sup> Lempe mercadoca tmojtsena soyënguentšana šmochjase, ntjatstjanaycá chë mëntšena aíñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá

jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama; <sup>26</sup> er ntšamo Bëngbe Bëtsabe uabemana palabrënguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canye ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóbocnama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. <sup>28</sup> Pero nderado nda tcmojáuyana: “Quem mëntsena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebomna juabnënga, chë chca jamama ndoñe tšabá bëtsemnama. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnama, ntšamo chë inyabe ainaniñe juabna yobomnama ca? <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inya sochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtšesá, o chašmojtsofšëšná, o ndaye inye

soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿnayama. <sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiana, ni ndoñe judiëngbiana, ni chë Bëngbe Bëtsábeñe ošbuachiyëngcá enefjuanëngbiana. <sup>33</sup> Smochtsama ntšamo atše sëndëntšencá, nÿetscanga nÿetsca soyënguiñe oyejuayënga jtsabamnama, lempe ntšamo stjobenacá jtsamëse, ndoñe nÿe atšbe tšabiana, ndayá masna chë ínÿengbe tšabiana, chënga chamotsobenama chëngbe bacna soyënguentšana atsebácanënga jtsemnama.

## 11

<sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnama, ošbuachiyëngcá tmojënefjna ora*

<sup>2</sup> Atše sëntseboše tšëngaftanga jáuyanana tšabá šmojama ca, tšëngaftanga nÿetsca soyënguiñe atšbiana šmnétsenojuabnama, y tšëngaftanga šmojtsabuátambama y šmojtsamama ntšamo tcbonjanabuatambacá, cachcá ntšamo atše sënjëftsanboshjoncá. <sup>3</sup> Pero atše sëntseboše tšëngaftanga chacmësertá: nda nÿetsca entsanga iuaménda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canÿe boyabása chabe bestšaše

tojtsenátsbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšášeca chca tojama causa. <sup>5</sup> Pero nderado canye shembása chabe bestšaše ndoñe tontsenátsbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. <sup>6</sup> Er, nderado canye shembása ndocna te tontseboše chabe bestšaše jtsenátsbotsana, chabiamá más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnana cha yochtsëuatja ca, as chabe bestšaše chaotsenátsbotse. <sup>7</sup> Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinyanñayana Bëngbe Bëtsá chabe mandayá yomnana. Pero ntšamo chë shembása yomncá, jtsinyanñayana chë boyabása chabe mandayá yomnana; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chíyeca, y chca jamama angelënga tšabá jtsinyanánayeca, shembása jtsemnana chabe bestšaše chaotsenátsbotsama, chca, chaotsinñanama inya chábeñe yomándama. <sup>11</sup> Pero, Bëngbe Utabnábeñe



ošbuachiyëngcá jtsiyenamna, boyabásenga y shembásenga cachcá jtseytëtanana. <sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiamna Bëngbe Bëtsáftaca jencuéntana, bestšaše ntsenatsbotscá. <sup>14</sup> Ntšamo entšanga sempre mondbetsejuabnaycá, ndayá tšabá bëtsemnama, bëngbioye jtsabuátambayana, boyabása bën stjënësha chabuájuama tojalesenciase, cha jamana cachá chama chaotsëuatjama.

<sup>15</sup> Pero shembásabiamna, chë bën stjënësha jtsinÿanÿnayana chabe botamanana y uámanana, er Bëngbe Bëtsá tojanma shembása bën stjënësha chaotsábomnama, chca, cha chaotsebomna ndáyeca chabe bestšaše jtsenátsbotsama.

<sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnama.

*Bëngbe Utabnabiamna jtenójuaboyama jasama ora, chënga ndoñe tšabá imonjánama*

<sup>17</sup> Mora cbochanjamënda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinÿana chë soye yojtsoserverna tšëngaftanga más bacá chašmotsemnama, y

ndoñe tšëngaftangbe tšabiama. <sup>18</sup> Natsana cbochjáuyana, atše sënjouena tšëngaftanga ošbuachiyëngcá šmojënefjna ora, báseftanga canÿe soye innétsejuabnaye y ínÿengna inÿetšá ca, y atše sëntsejuabná batšana ndegombre chca yojtsemna ca. <sup>19</sup> Ndegombre jtseytana tšëngaftangbeñe chamotsemna báseftanga canÿe soye juabnayënga y ínÿengna inÿetšá, chca, nÿetscanga chamotsetatšëmbuama ndëmuanÿënga imojtsemna chë Bëngbe Bëtsá tojayana chënga tšabá tmojama ca. <sup>20</sup> Tšëngaftanga tandëse jasama y vínoye jofšiyama šmojënefjna ora, ntšamo bënga fsënduamancá, Bëngbe Utabná bëngbiana tojanóbanama jtenójuaboyama, ndayá chora tšëngaftanga šmnetšamcá, ndoñe quenátšmëna ntšamo ndegombre cmojtsamncá, chë Bëngbe Utabnabiana jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nÿetscanga ndayánaca jasama chamotsebomnëntscuana; báseftanga shëntseca joquédana, y ínÿengna tša jëftsesana y jofšiyana jëftsótmenantscuana. <sup>22</sup> ¿Tšëngaftanga ndoñe yebna šmondpomna ndayentše jasama y jofšiyama? ¿Ndáyeca tšëngaftanga šmojtsejuabná chë innénefjna ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiana jasama ora chca šmojamama? ¡Ndegombre ndoñe!

*Bëngbe Utabnabiamá jtenójuaboyama saná  
(Mt 26.26-29; Mc 14.22-25; Lc 22.14-20)*

<sup>23</sup> Er atše cach Bëngbe Utabnábentsšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšične tmojánboshjona ibeta, tandëše tojanca, <sup>24</sup> Bëngbe Bëtsábioye tbojtanchuá chentsšana, tojanjatá y tojánayana: “Quem tandëše atšbe cuerpo entsemna; tšëngaftangbe tšabiamá chanjóšana. Ntšamo mora montsamcá šmochtsamá, atšbiamá jtenójuaboyama ca.” <sup>25</sup> Cachcá, chë saná tmojansentsšana, coptema tojanaca y tojánayana: “Quem coptema vínoye atšbe buične entsemna. Atšbe buične echanjuábuashana tšëngaftanga chašmotsetatšëmbuama, ntšamo Bëngbe Bëtsá entsanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiamá jtenójuaboyama ca.” <sup>26</sup> Er tšëngaftanga cada quemëntša tandëše chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinÿanÿnaye cha entsangbiamá tojanóbanama.

*Ntšamo yomna jamana, Bëngbe Utabnabiamá jtenójuaboyama jasama ora*

<sup>27</sup> Chcasna, Bëngbe Utabnabiamá jtenójuaboyama jasama ora, ndánaca tandëšentsšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiamá Bëngbe Bëtsá jayanana cha puerte bacna soye tojama ca. Chë entšá chca tojama ora,

cha jtsinÿanÿnayana, Bëngbe Utabnabe cuerpo y buiñe chabiamá tondaye yonduámanama. <sup>28</sup> Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. <sup>29</sup> Er nderado nda tojase y tojofšé, chë Bëngbe Utabnabiamá jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. <sup>30</sup> Chíyeca, banga tsëngaftanguentsënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana. <sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játaçastigana, ntšamo tsabá yomncá ndoñe tmonjase causa. <sup>32</sup> Pero, Bëngbe Utabná castígoca chca šojabuayená ora, jtsemnana bënga más tsabá jtsamama chamuatsjínÿama, y chca, bayté chentšana, Bëngbe Bëtsá ndoñe chabondëtsemna játayanana bënga šojtsamna nÿetsca tescama castigánënga jtsemnana ca, cánÿiñe chë nÿe quem luarama enójuabnaye entšangftaca.

<sup>33</sup> Chca, Jesucristbeyeca atšbe catšátanga, tsëngaftanga chë Bëngbe Utabnabiamá saná jasama chašmojénefna ora, cánÿiñe nÿetscanga šmochjabojátša. <sup>34</sup> Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tsëngaftanga jácaçastigana chora ndoñe tsabá

šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

## 12

*Bëngbe Bëtsabe tšetana obenana, tšabe soyënga jamama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondétatsëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoobenana. <sup>3</sup> Chiyeca, atše mora sëntseboše tšëngaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espíritu jamana bënga ndoñe chamondëtsebonnama cachca tšetana obenana tšabe soyënga jamama, pero lempe jobayana cach canÿe Espíritbeyeca. <sup>5</sup> Bënga, Bëngbe Bëtsá mondëservena, nÿetsca soyënguñe jtsetrabájayëse, pero cach Utabná nÿets chë trabajënga šojabanÿé.

6 Njetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnama. 7 Bëngbe Bëtsá inétsama cada ošbuachiyá chaotsebomnama canye tšetana obenana tšabe soyënga jamama, y chë soye jtsinÿanÿnayana Bëngbe Bëtsabe Espiritu chabe ainaniñe yomnama; y chë tšetana obenana jtsemnana nÿetscangbe tšabiamana. 8 Bëngbe Bëtsá, Espiritbeyeca, canya obenana jatštayana puerte osertanánaca chaóyebuambama, y inÿana obenana cach Espiritbeyeca ndayámnaca corente jtsetatšëmbëse chaóyebuambama; 9 inÿana cach Espiritbeyeca, obenana Crístbeñe puerte chaotsošbuáchema, y inÿabiamna, cach nÿe canye Espiritbeyeca, obenana jatštayana šoquënga jáshnama; 10 inÿana, obenana tšabe soyënga Bëngbe Bëtsabe obenánaca jamama, y inÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiriténgbeyeca tojtsemnana, y inÿana, obenana chë tempo ndmabiyáñnaca chaóyebuambama, y inÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y inÿengna chama jábuayenama. 11 Pero cach Espiritu, chë nÿe canye Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

*Njetsca ošbuáchiyënga cánÿiñe, mo Crístbe cuer-  
pcá jtsemnana*

<sup>12</sup> Cuerpo n̄ye can̄ye soye endm̄ena y ch̄e cuerpna ba soȳenga jtsebm̄nana; masque ch̄e cuerpo ba soȳenga jtsebm̄nana, n̄ye can̄ye cuerpo jtsemnana. B̄engaft̄acnaca cachc̄á. B̄enga banga mondm̄ena n̄yetscanga Cr̄ístbeñe ošbuáchiȳenga, pero Cr̄ístbeyeca, b̄enga cán̄yiñe mo can̄yacá jtsemnana. <sup>13</sup> Er b̄enga n̄yetscanga, judīenga o ndoñe judīenga, n̄ye ín̄yabiam̄a n̄yets tempo oservén̄enga o cach̄engbiama trabájaȳenga šojan̄ebaye, Cr̄ísoftaca cán̄yiñe mo can̄yacá, jtsemnama mo chabe cuerpc̄á, y chca yomna cach Esp̄iritbeyeca; y B̄engbe B̄etsá tojama cach Esp̄iritu n̄yetscangbe ainanoye cháumash̄enguama, b̄enga jtsam̄endayama.

<sup>14</sup> Cachc̄á, can̄ye cuerpo ndoñe n̄ye can̄ye soye ntsebm̄nana, ndayá ba soȳenga. <sup>15</sup> Nderado shecuatše tojayana: “Cucuatše ndoñe quetsátsm̄ena causa, atše cuerpentša soye ndoñe quetsátsm̄ena ca”. Chca tojayanamna, shecuatše mo ch̄e cuerpentša soye ndoñe cuaftsemncá ndoñe ntjátsm̄enana. <sup>16</sup> Nderado matscuaše tojayana: “Bomin̄ye ndoñe quetsátsm̄ena causa, atše cuerpentša soye ndoñe quetsátsm̄ena ca”. Chca tojayanamna, matscuaše ch̄e cuerpentša soye ndoñe cuaftsemncá ndoñe ntjátsm̄enana. <sup>17</sup> N̄yets cuerpo bominye tojtsemn̄ese, b̄enga ndoñe muantsobena jouenama. Y n̄yets cuerpo matscuaše tojtsemn̄ese, b̄enga ndoñe muanjobenaye jongūétsetsiyana. <sup>18</sup> Pero ndegombre endm̄ena, B̄engbe B̄etsá n̄yetsca soye cuerpentše tojancjá ndayentše cha tojánbošenentše. <sup>19</sup> N̄yetsca cuerpentša soȳenga

nÿe canÿe soye tojtsemnÿese, ndoñe canÿe cuerpo nántsemna. <sup>20</sup> Pero ndegombre endmÿena, masque ba soyÿenga cuerpentſe yomna, nÿe canÿe cuerpo jtsemnana.

<sup>21</sup> Bominÿe quenátobena cucuatſe jauyanana: “Ndoñe quecátsiyta ca”; y cachcá, bestſaſe quenátobena shecuatſe jáuyanana: “Ndoñe quecátsiyta ca”. <sup>22</sup> Inÿetſá, chÿe cuerpentſa soyÿenga, chÿe tojtsinÿana mo obenana ndbomna y nduámana soyÿengcá, jtsemnana chÿe cuerpama más iyta soyÿenga. <sup>23</sup> Chÿe cuerpentſa soyÿengama, ndayama bÿenga tmojtsejuabná más nduámana soyÿenga yomna ca, bÿenga jamana más chaotsámanama, chiñe entſayaca jtichÿtjÿese. Y chÿe cuerpentſa soyÿenga, ndayama bÿenga jtsëuatjana ínÿenga chamotsonÿama, bÿenga jamana ínÿenga ndoñe chamondÿetsonÿama, chiñe entſayaca jtichÿtjÿese. <sup>24</sup> Pero chÿe cuerpentſa soyÿengaca, chÿe nÿetscanga jtsonÿayana y botamana jinÿama jtsemnana soyÿengacna, ndoñe ntseytana chca játamana. Bÿengbe Bÿetſá cuerpo tojama, ntſamo bÿenga chamotsamama chentſa más nduámana soyÿenga, más chaotsámanama, ntſamo chÿe soyÿenga bÿenga tmojtsinÿenama. <sup>25</sup> Cha chca tojanma, cuerpentſa nÿetsca soyÿenga chÿe cuerpama trabajo cánÿiñe chamotsamama, y chca, cada soye chaotsama trabajo chÿe cuerpentſa nÿetsca soyÿengbe tſabiama. <sup>26</sup> Nderado canÿe cuerpentſa soyama bacna soye tojopasá, chora nÿetsca chÿe cuerpentſa soyÿengámnacna chca ndoñe tſabe soye jtsebínÿnana; pero canÿe cuerpentſa soyama tcojama más uámana soye chaotsemnana o ndaye tſabe



soye tojopasase, chora nÿetsca chë cuerpentša soyëngámna chca tsabe soye jtsebínÿnana.

<sup>27</sup> Cachcá, tsëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tsëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup> Ntsamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe. <sup>29</sup> Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama. <sup>30</sup> Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana

bonnënga ntšamo tmojtsichamcá josértama y ínÿengbioye chama jtsabuayiynayama. <sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y ínÿe soye más, atše cbochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseeservénëse.

## 13

<sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. <sup>2</sup> Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanësna, atše tondaye sëntsemna. <sup>3</sup> Y atše lempe ntšamo stsebomncá ndbomnjëmënga stsëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe

tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntsenábotamnayana, ni cachá chë ínÿengbiana más uamaná ntjáténobiamnayana; <sup>5</sup> ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana. <sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aiñe. <sup>7</sup> Inÿenga ababuanÿeshaná, ainaniñe añemo jtsebomnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

<sup>8</sup> Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyeuambnama, ni chë ndocna te ndmabiyañe chamotsóyeuambnama, ni chë puerte jtsetatšëmbëse jóyeuambayama obenama chamotsebomnama; <sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nÿe batsatema bëngbioye jtsinÿanÿnayana Bëngbe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiana yojanjuabnacá, quem soyënga, chë

nÿe batsatema bēngbioye jtsinÿanÿnayana Bēngbe Bētsabe soyēngama, ya ndoñe más queochátsbinÿna.

<sup>11</sup> Atše bāsetema ora, sēnjanoyebuambná, sēnjanjuabná, y soyēngama tšabá jtsetatšēmbuamna sēnjanjuabná mo canÿe basetemcá; pero bētsá sēnjanóbema orna, sēntsanajbaná lempe amana mo canÿe basetemcá. <sup>12</sup> Cachcá, mora bēnga quem luarentše nÿe batsatema Bēngbe Bētsabe soyēngama jtsetatšēmbuana, mo canÿe espejuiñe tmojtsonÿacá, pero ndoñe nÿa corente tšabá. Pero canÿe te bēnga mochántsetatšēmbo lempe nÿetsca soyēngama, bēnga Bēngbe Bētsabe delante chamojtsemna ora. Mora atše sēntsetatšēmbo nÿe batsatema Bēngbe Bētsabe soyēngama, pero chora lempe chanjuábuatmana, ntšamo Bēngbe Bētsá corente šuabuatmcá.

<sup>13</sup> Pero morna, Bēngbe Bētsábeñe jtsošbuáchiyana, chábeñe jtsobátmanana, y chábioye y ínÿyēngbioye jtsababuánÿeshanana, chē soyēngna nÿetsca tescama jēftsemnana; pero chentšana chē más uámana soye endmēna ínÿyēnga jtsababuánÿeshanana.

## 14

### *Ndmabiyañe obenana Bēngbe Bētsabe tšetánana*

<sup>1</sup> Bētscá šmochtsama nÿetscanga jtsababuánÿeshanēse chašmotsiyenama, y puerte šmochtseboše jtsebomnama chē Bēngbe Bētsabe tšetana obenana tšabe soyēnga jamama; pero chentšana masna, chē Bēngbe Bētsabe juabna jóyebuambayama obenana. <sup>2</sup> Er chē tempo ndmabiyañe mora jóyebuambayama

obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espítoftaca jtsóyebuambnayana y ndoñe nýe chabe juábnaca, chë tempo Bëngbe Bëtsá ndocna entšábioye tbonjaninýinýe soyëngama. <sup>3</sup> Pero chë Bëngbe Bëtsabe juabna oyebuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguiñe tmojtsemna órnaca añemo chamotsebomnama. <sup>4</sup> Chë tempo ndmabiyañe mora jóyebuambayama obenana bomná, jtsamana nýe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyebuambnayana jtsamana chë ošbuachiyëngcá enefjuanënga chca soyënga chamotsebomnama.

<sup>5</sup> Atše sëntseboše nýetsca tsëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tsëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyebuambnayá más uamaná jtsemnana chë inýe biyañe oyebuambnayabiama; chca ndoñe nántsemna, ntšamo canýe biyañe tojayancá chë biyañe oyebuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnama. <sup>6</sup> Y mora, Jesucrístbeyeca atšbe

catšátanga, atše nderado tchojábuache y nÿe inÿe biyañe tchojáuyanëse, ¿chca ntšamo chatjújabuache? Atše jtsobenana jujabuáchana, nÿe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinÿinÿecá entsanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juéнанana, mo flautëfja o arpa, vida ndbomna soyënga; cada sóyeca inÿetšá juéнанama ndoñe tontsopodénëse, ndocná nantsobena jtsetatšëmbuama ndayá canÿa chë soyëngaca yojtséнанama. <sup>8</sup> Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inÿetšá, nÿa chama ndoñe tonjuájatëtëse, ndocná buanjoseráta y jenpéliama ndoñe nanjopróna. <sup>9</sup> Tšëngaftangaftácnaca cachcá jtsopasánana. Inÿenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nÿe cánÿenga cuaftsoyebuambnacá. <sup>10</sup> Atše sëntsejuabná, ndegombre quem luarentše ba inÿe biyañe entsanga imnëtsoyebuambnayana, y ndaye biyañnaca tmojoyebuambá ora, sempre jtsemnana ínÿenga ntšamo chënga tmojtsichamcá osertánënga. <sup>11</sup> Pero ntšamo inÿa chabe biyañe šojauyancá atše ndoñe šontsësertánëse, atše stsemna canÿe chabíama ndosertana biyañe oyeambuambayá, y chánaca cachcá atšbíama. <sup>12</sup> Chcasna, chë Uámana Espíritu šondinÿanÿná

obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

<sup>13</sup> Chíyeca, chë tempo ndmabiyañe mora jóyëbuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuayenama obenana chaotsebomnama. <sup>14</sup> Pero atše Bëngbe Bëtsáftaca stjencuénta, chë ndmabiyañe jóyëbuambayama cha obenana šojanatšetacá jtsóyëbuambnayëse, atšbe espíritu cháftaca nantsóyëbuambnaye, pero atšbe juabna ndoñe ntsetatšëmbuana ntšamo chë espíritu tojtsoyëbuambnacá. <sup>15</sup> Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayésnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. <sup>16</sup> Nderado aca Bëngbe Bëtsá cojtsatschuaná nye espíritoca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquécá cha yojtsejuabnama jinñinñiyama, er ntšamo cojtsichamcá cha ndoñe ntsësertánana. <sup>17</sup> Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnama. <sup>18</sup> Atše, Bëngbe Bëtsá sentsatschuaná inye biyañe jóyëbuambayama

tšëngaftangbiamá más tsobenarú; <sup>19</sup> pero Crístbeñe ošbuachiyëngcá tmojënefjna ora, atše más sëndbétseboše nÿe mo shachna palabratémnaca jóyebuambayana, chënga aíñe catafjosertacá, chca, ínÿenga jabuátambama, y ndoñe bnëtsana uaranga palabrénga jatóyebuambnayana inÿe biyañe, chënga chaósertama ndoñe tontsopodénëse.

<sup>20</sup> Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye. <sup>21</sup> Bëngbe Bëtsabe uabemana palabrénguiñe, Bëngbe Utabná mëntšá tojánayana:

Atše quem entšángbioye chanjáuyana,  
 ínÿenga inÿe luarëngocana ashjajnëngaftaca,  
 chëngbiamá canÿe ndosertana biyañe  
 oyebuambnayënga;  
 y chanjáuyana ndayá chëngbe biyañe chamojt-  
 sichamo soyëngaca;  
 pero ni chca, chënga ndoñe quešmochatóyeunaye  
 ca.

<sup>22</sup> Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe.  
<sup>23</sup> Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo



canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. <sup>24</sup> Pero nyetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canÿa Bëngbe Bëtsábeñe ndošbuachiyá o canÿa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayënjaná cha bacna soyënga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama. <sup>25</sup> Y Bëngbe Bëtsá chábioye bochanjinÿinÿiye ntšamo cha ainaniñe tojajuabó y tojabošencá, ndayá ndocnábioye tbonjinÿinÿecá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

*Ošbuachiyëngcá šmojénefná ora, ntšamo tšabá yomncá lempe šmochtsama*

<sup>26</sup> Chcasna, Jesucrístbeyeca atšbe catšátanga, šmojénefná ora, cada ona ndayánaca jtsebomnana nyetscangbiama: ínÿengna jtsobenana javérsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entšanga jábuayenana ntšamo inÿa inÿe biyañe tojayancá. Pero lempe šmochjama, ošbuáchiyënga más chamot-sošbuáchema y más añemo chamotsebomnana Cristo jasérviamo. <sup>27</sup> Nderado inÿe biyañe jóyebuambayama tojtsemnëse, útata o nÿa másese

únganga chca chamoyebuambá, y canyánÿa;  
 y jtseytana ndánaca ntšamo tmojtsichamcá  
 chabosertá y nÿetscanga chama chauabuayená.  
<sup>28</sup> Y chca chabosertama y nÿetscanga jábuayenama  
 ošbuachiyëngbeñe ndocná tontsemnëse, as  
 ošbuachiyëngcá chamojénefjna ora chë chca  
 oyebuambnayá bontsemna ndoñe chca biyañe  
 ntsóyebuambnayana, sinó nÿe canÿa tojtsemna  
 ora cha jtsoobenana chca Bëngbe Bëtsáftaca  
 jencuéntana. <sup>29</sup> Utata o únganga entsamna  
 jayanana soyënga, Bëngbe Bëtsabe juábnaca  
 jtsóyebuambnayëse; y chë ínÿenga jtsamnana  
 botamana jajuaboyana y jayanana ntšamo chënga  
 tmojayancá aíñe o ndoñe Bëngbe Bëtsábiocana  
 tayojsóbocanama. <sup>30</sup> Pero canÿa Bëngbe Bëtsabe  
 juabna tojtsóyebuambnantscuana, inÿa chentše  
 ouenana tbemanábioye Bëngbe Bëtsá tbojinÿinÿé  
 ndayánaca yojtsebomna jayanama, as chë natsana  
 oyebuambnayá iytëca chaóbema, y chabolesenciá  
 chë inÿa chaóyebuambama. <sup>31</sup> Chca, nÿetscanga,  
 canyánÿa jtsoobenana jayanana soyënga, Bëngbe  
 Bëtsabe juábnaca jtsóyebuambnayëse, nÿetscanga  
 chamuatsjínÿama y nÿetscanga añemo jatšatayama.  
<sup>32</sup> Chë Bëngbe Bëtsabe juabna oyebuambnayá  
 endobena jtsemándayana ntšamo tojtsichamcá,  
 cha cachabe espíritoca tojtsoyebuambná ora;  
<sup>33</sup> er Bëngbe Bëtsá endmëna nda inétsama bënga  
 natjëmbana chamotsiyenama, y ndoñe chë bënga  
 nÿetscanga cachcá ndoñe chamondëtsejuabnama, y  
 nÿe ntšamo cada ona tojtsebošcá chaotsamama.

Ntšamo nÿets luarënguenache, chë  
 ošbuáchiyënga, chë Bëngbe Bëtsabe entsanga

mondbénefjna luarënguenache endbetsemncá,  
<sup>34</sup> tšëngaftangbéntšnaca, shembásenga entsamna  
 iytëca jobiamëngana, ošbuachiyëngcá šmojénefjna  
 ora, er ndoñe quenátslesenciana chënga chora  
 chamuátoyebuambnama, y aíñe chënga entsamna  
 chëngbe boyanga jtsayaunanana, ntšamo  
 Moisesbe leyíñe endayancá. <sup>35</sup> Chënga ndayánaca  
 jtsetatšëmbuama tmojtsebošëse, cachëngbe  
 boyángbioye yebnoca chamotjanga; er ndoñe  
 corente tšabá ntsemnana canye shembása  
 jtsóyebuambnayana tšëngaftanga ošbuachiyëngcá  
 šmojénefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe  
 tšabe noticiënga tšëngaftangbeñe tojanobojatšé ca,  
 o nye tšëngaftanga chë soyënga šmojanóyëngacñe  
 ca? Ndegombre ndoñe chca; chíyeca tšëngaftanga  
 nye cányënga ndoñe ntsoberenana jayanama ndayá  
 jamama cmojtsamnama. <sup>37</sup> Nda tojtsejuabná  
 cha Bëngbe Bëtsabe juabna oyebuambnayá  
 yomna ca, o chabe ainaniñe chë Espíritu  
 jtsemándayama yojtsebomna ca, cha bontsemna  
 tšabá jtsetatšëmbuana, ntšamo Bëngbe Utabná  
 šojamandacá atše stsabiamnama. <sup>38</sup> Pero  
 cha ndoñe chca tontsetátšëmbo y chca ndoñe  
 yondmëna ca tojayanëse, ndayá cha tojayanacá  
 ndoñe šmatjóyëngacñe.

<sup>39</sup> Chcasna, Jesucrístbeyeca atšbe catšátanga,  
 puerte šmochtseboše Bëngbe Bëtsabe juábnaca  
 soyënga jtsóyebuambnayama obenana jtsebom-  
 nama, y ndoñe šmattsama chë tempo ndmabiyañe  
 ín'yënga ndoñe chamondëtsóyebuambnama; <sup>40</sup> pero  
 lempe šmochjama ntšamo jamama yomncá, y

ndoñe nýe ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše séntseboše tšëngaftanga chašmuatenójuaboma atše tčbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtse servénëse šmojtsiyena. <sup>2</sup> Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nýe ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëftsanboshjona, Bëngbe Bëtsábicana atše tijanóyëngacñe más uámana buatëmbana soyënga. Atše tčbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá; <sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrenguiñe chabe juabna oyebuambnayënga chama tmojanayancá; <sup>5</sup> chë Pédrëbioye tbojánëbëbocnama, y chentšana chë bnëtsana útata ca uabobáinëngbioynaca. <sup>6</sup> Chentšana mo shachna patsama más chábeñe ošbuáchiyënga tojánëbëbuacna, chënga cánýentšë imojtsemna ora; chënguentsanga banga cabá vida imotsóbomñe, masque báseftanga ya tmojóbana.

7 Chentsana Santiágbioye tbojánebëbocna, y chentsana nyetsca chabe ichmónëngbioye.

8 Y chentsana átsnaca šonjánebëbocna. Mo canÿe šešona cabá shbená tojonÿnacá, Cristo chabe ichmoná šonjábema, chë tempo chama jopróntama ntsebmncá, ndayëntscuana ínÿenga cha tojanabuatambá. 9 Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama.

10 Pero Bëngbe Bëtsá atšbe tšabiamama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiamama jtsamana, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiamama; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiamama jtsebmñese.

11 Ndayá más yojtsámama ndoñe quenátsmëna, atše o chënga, Jesucristbe soyëngama abuyaynayañe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

*Chë obanënga cachiñe vida mochtsatsbomnama*

12 Pero bëngbe buayenana soye endmëna, Bëngbe Bëtsá tojanama Cristo cháuatayenama; as çndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? 13 Pero chca tojtsemna, chë obanënga ndoñe mochántayenasna, Cristo cach ndoñe tontanayena; 14 y Cristo ndoñe

matenjésayenëse, bënga nÿe bonamente chabiam  
 fstsabuayiyná, y tšëngaftanga nÿe bonamente  
 chábeñe šmojtsošbuaché. <sup>15</sup> Y canÿe más bëts  
 soye: chca tojtsemnësna, bënga muanjábozna  
 mo chë Bëngbe Bëtsabiam soyënga tmojinÿe  
 ca ichamëngcá, pero ndoñe ndegombre chca  
 tontsemna; er bënga fsëndbëtsichamo, Cristo  
 cháuatayenama Bëngbe Bëtsá tojanma ca. Pero chë  
 obanënga ndoñe mochántayenasna, Bëngbe Bëtsá  
 ndoñe tonjanma Cristo cháuatayenama. <sup>16</sup> Pero  
 chë obanënga ndoñe mochántayenasna, Cristo cach  
 ndoñe tontanayena. <sup>17</sup> Y Cristo cháuatayenama  
 Bëngbe Bëtsá ndoñe matënjanmëse, tšëngaftanga  
 nÿe tondayama chábeñe šmojtsošbuaché;  
 tšëngaftanga chë bacna soyëngama cabá ndoñe  
 perdonánënga šmontsemna. <sup>18</sup> Y chca, chë  
 tmojanóbanënga, Crístbeñe ošbuáchiyënga, chënga  
 cach ndoñe chëngbe bacna soyënguentšana  
 atsebácanënga quemochátsmëna, sinó nÿetsca  
 tescama castigánënga. <sup>19</sup> Bënga tmojtsobátmana  
 Cristo bëngbiam tšabe soyënga chaotsamama,  
 pero chca nÿe quem luarentse bënga vida  
 tmojtsebomnëntscuana, as bënga nÿetscangbiam  
 más muantsomerecena, nÿetscanga bëngbiam  
 chaotsangmënama.

<sup>20</sup> Pero chca ndoñe ndegombre quenátsmëna,  
 er ndegombre Bëngbe Bëtsá tojanma Cristo  
 cháuatayenama. Mo chë uanatsena shajuancá,  
 jtsinÿanÿnayana más shajuanënga chentšana  
 yochjóbozna, cachcá, Cristo tojtanayena ora,  
 cha tojaninÿanÿé Bëngbe Bëtsá yochjanma ínÿënga  
 chábeñe ošbuáchiyënga chámuatayenama vida

chamotsatsbomnama. <sup>21</sup> Chca, ndayá canye entśá, Adán, tojanmama, nyetscanga jóbanama yojtsamna, cachcá, ntšamo inye entśá, Cristo, tojanmama, Bëngbe Bëtsá yochjama entśanga chámuatayenama. <sup>22</sup> Er ntšamo, Adánbentsana entśanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nyetsca tescama yomna tšabe vida chënga chamotsebomnama. <sup>23</sup> Pero Bëngbe Bëtsá jamana cada ona cháuatayenama nya chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nyetscanga chë Crístbe entśanga imomnënga. <sup>24</sup> Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nyetsca mandadënga, mando y obenana bomnënga corente jtsayëñjanayëse. <sup>25</sup> Er Cristo bontsemna inyënga mo reycá jtsamëndayana, chabe uayayënga chabe cucuatšiñe chamoquedama Bëngbe Bëtsá tojamëntscuana. <sup>26</sup> Canye uayayá inétsama entśanga jóbanama; pero Cristo último echanjama chabe obenana pronto chaotsopochocama. <sup>27</sup> Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodénana puerta tšabá jinÿama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama. <sup>28</sup> Y Cristo nyetsca soyënguiñe chaojtsemánda ora,

cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínÿniñe.

<sup>29</sup> Inÿetšánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? <sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Cristbiana oserverna causa? <sup>31</sup> Atšbiana cada te resjo endmëna jóbanama. Jesucristbeyeca atšbe catšátanga, atše sentsichamo, chca ndegombre yómnyayeca, atše oyejuayá stsemna ca, mo Cristo Jesús Bëngbe Utabnabe canÿe oservernacá, tšëngaftanga chábeñe šmojtsošbuáchema. <sup>32</sup> Mo canÿa tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nÿe chë entšanga mondbëtsejuabnaye jëftsashjáchama soyënga jtsebošëse chca matsjammëse, ¿ndaye tšabe soye matënjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofsiye, nderado yëfse muatjóbana ca!”

<sup>33</sup> Ndoñe matenoíngñana. Ntšamo canÿa tojanayancá: “Nderado nda bacna amiguëngaftaca tojtsenutaná, cha jtsajbanana



chë tšabe soyënga, ntšamo jtšamëse yojoyena.”  
<sup>34</sup> Tšabá šmochtenójuaboye, y juabna ndbomnacá  
 ndoñe; y šmochtsajbaná bacna soyënga amana,  
 chë obanënga ndoñe mochántayena ca juabnaye  
 causa, er báseftanga tšëngaftanguentšë Bëngbe  
 Bëtsabe soyënga ndoñe quešmatábuatma. Atšë  
 chca sëntsichamo tšëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo  
 chë obanënga mochtayena ca? ¿Mocna cuerpo  
 mochtsebomna ca?”  
<sup>36</sup> ¡Juabna ndbomna  
 entšá! Ndayá tcojajé orna, jtseytana chë  
 jénaye chaóbanama, chë matatema vida  
 chaotsebomnama. <sup>37</sup> Ndayá tcojajecá ndoñe  
 ntsemnana chë juábocnama matatema, ndayá  
 nyë chë meshe, trigo meshe o ndaye mata  
 méshnaca jtsemnana. <sup>38</sup> Pero Bëngbe Bëtsá jamana  
 chë jénayentšana mata chauábocnama, ntšamo  
 jamama cha tojajuabocá; y cha jamana cada  
 jénayentšana canyë mata chauábocnama, ntšamo  
 chë jénayentšana chauábocnama tojtsemncá.  
<sup>39</sup> Nyetsca cuerpënga ndoñe cachcá ntsemnana.  
 Entšanga canyë cuerpo mondbomna, bayënga  
 inyë cuerpo, shloftšënga inyë cuerpo, y beongna  
 inyë cuerpo. <sup>40</sup> Chë celoca vida bomnënga inyëtsá  
 jtsinynana, y chë quem luarentšë vida bomnëngna  
 inyëtsá. Pero chë buashinÿinÿanana y botamanana  
 ntšamo celoca vida bomnënga jtsinÿnancá, ndoñe  
 cachcá ntsemnana chë quem luarentšë vida  
 bomnëngbe botamanancá. <sup>41</sup> Cachcá, shinÿe  
 ndoñe quenátsbomna cachca buashinÿinÿana

juashconcá, ni estrellëngcá; y estrellënguentše cach ndoñe cachcá ntsebuashinÿinÿanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, ínÿenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca. <sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinÿinÿana y echantsámana. Bënga quem luarentše imoyenëntscuana imobomna cuerpo, nÿe batšá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna.

<sup>44</sup> Quem luarentše imobomna cuerpo endmëna cam luarentše vida chaotsebomnana; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canÿe cuerpo quem luarentše vida chaotsebomnana yómnayeca, canÿe cuérpënaca, jtsemnana celoca vida chaotsebomnana.

<sup>45</sup> Chca Bëngbe Bëtsabe uabemana palabrënguiñe endayana: “Bëngbe Bëtsá, chë natsana entšá tbojanma chaotsainama ca.” Adánbentsana nÿetsca entšanga jabocanana, pero Crístbeyeca,

Bëngbe Bëtsá tojama banga mo tsmëma entšangcá chamotsemnana; chca, Cristo jtsemnana mo chë ústonoye Adancá; pero Cristna canye espíritu endmëna, y chë espíritu jamana entšanga chë nÿetsca tescama yomna tšabe vida chamotsebomnana. <sup>46</sup> Pero chë celoca nÿetsca tescama vida jtsebomnana cuerpna ndoñe natsana ntjóboznana, ndayá chë quem luarentše vida jtsebomnana cuerpo; chentšana chë celoca vida jtsebomnana cuerpo. <sup>47</sup> Bëngbe Bëtsá, chë natsana entšá tbojanma fshántseca, y chca, cha fshantsentšana tojánboznana; Cristna, mo entšángbentšana chë natsaná tsmacá bemanacá, celocana tojánboznana. <sup>48</sup> Adánbentšana, chë natsana entšá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinÿnana chë Bëngbe Bëtsá fshántseca tbojábema entšacá, cachcá bëngnaca mochtsinÿna ntšamo chë celocá yomnacá.

<sup>50</sup> Jesucrístbeyeca atšbe catšátanga, atše cbochjáuyana, nÿe quem luarentše vida jtsebomnana cuerpëngaca, bënga ndoñe ntsozenana Bëngbe Bëtsabe amëndayoye jamashënguana; ni ndayá yochjopochóca soye, ntsozenana ndayá ndoñe yochanjopochóca soye jtsebomnana. <sup>51</sup> Smochjouena, atše canye soye cbochanjáuyana, y chë soye Bëngbe Bëtsá entšanga tempo ndoñe tonjaninÿanÿe: Bënga ošbuáchiyënga nÿetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá.

<sup>52</sup> Nÿe betscó, mo tcojofshetá y cachora

tcojtafšnacá, quem luare ya jopochócama ora, canye ángel trompetéjua chaojuátëta ora, er chora trompetéjua echanjuénana, Bëngbe Bëtsá echanjama obanënga chámuatayenama, nÿetsca tescama vida jtsebomnama; y bënga, chë ainënga mochtsemnëngna, cha šochanjátrocaye mo tsmëmangcá jtsemnama; <sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrenguiñe chama endayancá:

Bëngbe Bëtsá tojayënjaná chë entšanga chamóbanama endbétsama obenana; entšanga ndoñe más quemochatóbana ca.

<sup>55</sup> ¡Mora entšanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nÿetsca tescama tojayënjaná ca!

<sup>56</sup> Entšanga bacna soyënga tmojama causa, obenana endmëna entšanga jóbana chaotsamnama. Ndayá leyiñe iuayanama, entšá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbana jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo

ayëñjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiana tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiana trabájayiñe, er tšëngaftanga šmondétatšëmbo, Bëngbe Utabnabiana trabájayiñe ndayá šmojamcá, ndocna te nÿe bonamente ntsemnana.

## 16

### *Jerusalenoca ošbuáchiyëngbiana crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entšanga ndbomñëjëmëngbiana tšëngaftanga šmochjuíchmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá.

<sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabaye; chca atše choye chajjá ora, ndoñe chacmondétsamna quem uajabótama chora crocénana játatbanayana. <sup>3</sup> Y atše choye chajjášhango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbioye tšëngaftangbe crocénana chámuayentšbuachema,

y tsbuanachangá chanjúyentšbuachiye ndayá

imojtsamama chënga jábuayenama. <sup>4</sup> Y nderado, átsnaca chëngaftaca jama tšabá tojtsemnëse, chënga átšeftaca chamua.

*Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajachnëngüentsana, chentša ošbuáchiyënga jaftsanyëse, er atše sëntsejuabná natsana Macedonia luaroye jéftsana. <sup>6</sup> Nderado baseftayté tšëngaftangbeñe chašuétsjetana, o nderádose nyets uaftena tempo; as tšëngaftanga inye luaroye játama chašmuájabuachama, ndémoye jama chašojtsemnoye. <sup>7</sup> Atše ndoñe quetsátsboše nye betscó tšëngaftanga jáftsanyana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchëntscuana. <sup>9</sup> Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamá endëtrabája, ntšamo atše sëndamcá. <sup>11</sup> Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chauatábama, er atše cha sëntsobátmana, chë inyënga muentše Crístbeñe ošbuáchiyëngaftaca.

12 Y Jesucristbeyeca bēngbe catšata Apólosna, atše bētská cha sēnjaimpadá, chē Jesucristbeyeca catšátanga tšēngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

*Pablo chēnga jtadiósoftanama*

13 Sempre šmochtsenocuedana chē Bēngbe Utabná ndoñe chašmondētservernana tojtsama soyēngama. Njēts tempo, Crístbeñe y chabe soyēnguífñaca šmochtsošbuáchiye. Ainaniñe puerte añemo šmochtsebmna, y bētská šmochtsama Bēngbe Bētsabe obenánaca.

14 Y njētsca soyēnga ntšamo chašmojtsamcá, bonshanánaca šmochtsama.

15 Jesucristbeyeca atšbe catšátanga, tšēngaftanga šmondētatsēmo, Estéfnas y chabe pamíllanga chē natsanēnga monjamnama Jesucristbeñe jtsošbuáchiyama, Acaya luaroca, y bētská imojtsentšena Bēngbe Utabnabiama jtsetrabájayana, chabe entšanga jtsējabuáchanēse.

16 Atše cbaimpadá, tšēngaftanga lempe šmochtsama ntšamo cmojtsamēndacá, chca entšanga mo tšēngaftangbe uanatsanēngcá, y ntšamo njētsca chē inyēnga mo bēngcá quemuiñe uajabuáchanēse trabájayēnga cmojtsamēndacá.

17 Atše tša oyejuayá sēntsemna tšēngaftangbe pueblentšana Estéfnas, Fortunato y Acaico moye tmojášhjajnama, er atše sēntsobena oyejuayá chēngaftaca jtsemnana, tšēngaftangaftaca choca jtsemnana cabá ndoñe sēntsobenēntscuana. 18 Er chēnga átšbioye tmonjabo y tšēngaftangbiama šmonjauyana, y chca chēnga tmonjama,

atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entsangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca.

<sup>20</sup> Muentša ošbuáchiyënga nÿetscanga cmontsacheuaná. Nÿetscanga šmochjenchuaye mo Jesucristbeyeca catsatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama. <sup>24</sup> Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.



**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
19104c0e-9046-5ff3-82fb-eb838c88dcf9